



刻唐詩二十六家序

夫詩自三百篇以來代有作者至於李

唐而音律始備今流傳者無慮百家元

和以後淪於卑弱無足取者自武德迄

於大曆英彥蔚興含毫振藻各臻玄極

雖體裁不同要皆洋洋乎爾雅矣大家

如李杜有集廣播洞庭徐太宰刻陳杜

而下十二家邇思陵蔣氏刻錢劉而下

十二家翼徐刻行世至如唐初若李嶠

若蘇挺輩盛唐若李頎若崔顥若常建



若祖詠若王昌齡輩中唐若李嘉祐若
郎士元若皇甫曾冉輩較之二氏所刻
諸名家豈少哉而都無刻本嗟乎荆玉
在璞隋珠在虵孰謂不可與照乘連城
侏者貫曾少遊五嶽家兄之門耽情藝
苑頗工詩學玩誦之下每懼湮沉遂傾
篋貸賞以壽諸梓庶幾傳播久遠俾苦
吟咏句之士盡覩一代美麗之撰云爾
嘉靖癸丑冬仲長至日後學江夏黃貫
曾謹序

刺唐詩二十六家序

士雅山人黃 姬水 撰

赫氏浮玉子梓唐人詩自武德迄建中
二十有六家成有誣之者曰唐人詩自
貞元以後其音緩替之漸也弗梓可也
以問余余作而嘆曰夫詩者聲也元聲
在天地間一氣而其變無窮者也取諸
洩志而真已矣代曷論也今之談詩者
其誰不曰風騷而下其漢與魏乎漢魏
而下其唐之盛乎指五尺童子而問之

亦知談如是也嗟乎名言也而未為通
方之說也即是而論則三百篇已矣奚
有於騷奚有于漢于魏又奚有于唐之
盛耶嗚呼今古時遷質文俗革聖人制
禮樂而不制于禮樂故苟根於志不必
復古苟出於真何嫌於今奚必易衣裳
而繕領反雕峻於茅茨者哉昔九方堙
相馬曰臣得其精而牝牡驪黃弗與也
以代論詩是以牝牡驪黃相馬失其精
者衆矣若曰氣有強弱調有高下以是

疵焉則天地之可以聲求者莫如風雷
必以奮者迅者為雷則殷殷然以鼓者
非雷也耶必以飄者颺者為風則颺颺
然以噓者非風也耶故悲壯雄奇者詩
也溫柔暢婉者亦詩也唯其真焉而已
浮玉子曰彼之誣者亦知貞元建中諸
子之撰其律和其情備非不嘉藻也慮
夫效之者其調日趨而莫之庶也余曰
否否在人今夫閨房閭巷未嘗論討而
其言可被管絃彼宿儒老師曰某格某

調卒歲穿求而不能幾一言者有矣故
如其人雖俯而為貞元建中真也猶之
章縫之士而為阡陌之談俗亦雅也非
其人雖合而為開元天寶弗真也猶之
市井之夫而習都人之語雅亦俗也嘗
聞陳思王曰有南威而論泚媛有龍泉
而議斷割竊笑夫窮鄙之社空其夫句
讀字義尚未或通却乃剽竊其辭倔強
其語哢哢然曰豕漢我魏豕盛唐也而
輒置其蜚喙以凌誚往哲可羞也已悲

夫悲夫良工獨苦寧自今哉有唐三百
年間不知作者凡幾而流傳於世者僅
百人耳雖所到不同緬想吟蒐靡不極
慮沉思殫其生平者矣則雖卑弱如晚
唐不可以訓而亦不可以湮也况郎拾
遺秦隱君皇甫司空輩可與錢劉抗行者
哉至如李蘓虞許接軫於沈宋顯詠頌
建方駕於王孟者所不待贅也于是浮
玉子命書簡末以詔同志云浮玉子嘗
學於先子五嶽山人故知詩嘉靖癸丑歲

臘月望日書于赤城山房



唐詩二十六家姓氏目錄

李嶠

賦一首

五言古詩八首

七言古詩三首

五言律詩一百四十五首

五言排律十六首

七言律詩二首

五言絕句二首

七言絕句三首

蘇廷碩

賦一首

五言雜詩十一首

七言古詩一首

五言律詩二十七首



五言排律二十七首

七言律詩十首

五言絕句三首

七言絕句四首

虞世南

賦二首

五言雜詩二十二首

許敬宗

賦五首

五言雜詩二十一首

李頎

五言古詩三十九首

七言古詩三十首

五言律詩十五首

五言排律十五首

七言律詩七首

五言絕句一首

七言絕句六首

王昌齡

五言古詩四十九首

七言古詩四首

五言律詩十首

五言排律一首

七言律詩二首

五言絕句十四首

七言絕句六十六首

崔顥

五言古詩九首

七言古詩十一首

五言律詩十一首

五言排律四首

七言律詩二首

五言絕句四首

七言絕句一首

崔曙

五言雜詩十四首

祖詠

五言古詩六首

五言律詩十八首

五言排律三首

七言律詩一首

五言絕句四首

常建

五言古詩三十六首

七言古詩三首

五言律詩七首

七言絕句十一首

嚴武

五言古詩二首

七言律詩三首

七言絕句一首

皇甫冉

五言古詩二十一首

七言古詩十三首

五言律詩八十二首

五言排律二十五首

七言律詩十五首

五言絕句二十七首

七言絕句十八首

皇甫曾

五言古詩一首

五言律詩二十七首

五言排律六首
七言律詩四首
五言絕句三首
七言絕句三首

權德輿

賦二首
五言古詩三十六首

七言古詩八首
五言律詩三十二首

五言排律六首
七言律詩十首

五言絕句七首
七言絕句八首

李益

五言古詩三十四首
七言古詩七首

五言律詩二十一首
五言排律三首

七言律詩五首
五言絕句二十首

七言絕句四十三首

拾遺四首

司空曙

五言古詩二首
七言古詩六首

五言律詩七十三首
五言排律十首

七言律詩十六首
五言絕句二十首

七言絕句十六首

嚴維

五言律詩三十四首
五言排律九首

七言律詩九首
五言絕句二首
六言一首
七言絕句六首

顧況

五言古詩十六首
七言古詩十五首
五言律詩六首
五言排律三首
七言律詩四首
五言絕句十三首
六言三首
七言絕句十七首

韓君平

五言古詩七首
七言古詩二十七首
五言律詩六十四首
五言排律四首

七言律詩三十首
五言絕句三首
六言三首
七言絕句十七首

雜言一首

武元衡

五言古詩八首
七言古詩八首
五言古今調二十三首
五言律詩五十八首
七言律詩十九首
五言絕句五首
七言絕句六十首
雜言一首

李嘉祐

七言古詩五首

五言律詩八十二首

五言排律五首

七言律詩二十三首

五言絕句三首

六言一首

七言絕句十首

耿漳

五言古詩三首

七言古詩三首

五言律詩九十五首

五言排律二十首

七言律詩十六首

五言絕句四首

七言絕句四首

秦隱君

五言律詩十六首

七言律詩七首

五言絕句二首

七言絕句十四首

郎士元

五言古詩六首

七言古詩二首

五言律詩三十七首

七言律詩十一首

六言一首

七言絕句六首

包何

五言律詩十一首

七言律詩五首

五言絕句一首

七言絕句二首

包佶

五言律詩十首

五言排律七首

六言一首

七言律詩二首

五言長篇一首

七言絕句五首

祀風師樂章五首

祀雨師樂章五首

嘉靖甲寅沓魯汪燮


黃氏刻于浮玉公房

姑蘇吳時用書
黃周賢金贊刻

李嶠集卷上

賦

楚望賦



序曰登高能賦謂感物造端者也夫情以物感而
心由目暢非歷覽無以寄杼軸之懷非高遠無以
開沉鬱之緒是以騷人發興於臨水柱史詮妙於
登臺不其然歟蓋人稟性情是生哀樂思必深而
深必怨望必遠而遠必傷千里開年且悲春目一
葉早落足動秋襟坦蕩忘情臨大川而永昔憂喜
在色陟崇岡以累歎故惜逝憫時思深之怨也搖

情蕩慮望遠之傷也遠則感遙而悼近怨則戀始而悲終遠節弘人且遊軫念苦心志士其能遺懷是知青山之顛每多惆悵之客白蘋之野斯見不平之人良有以也余少歷艱虞晚就推擇揚子甘泉之歲潘生秋興之年曾無侍從之榮顧有池籠之嘆而行藏莫寄心跡罕并歲月推遷志事遼落栖遑卑辱之地窘束文墨之間以此爲心心可知矣楚北有山者即禹貢所謂岐東之荆也峩峩高敞可以遠望余簿領之暇蓋嘗遊斯俯鏡八川周睇萬里悠悠失鄉縣處處盡雲烟不知悲之所集

也歲聿云暮遊子多懷援筆慨然遂爲賦云爾
眇乎忽焉高山之顛露團團而濕草風烈烈而鳴泉對蒼茫之寒日聽蕭索之悲蟬 獨處而無晤
吾凝睇乎八埏於是繁懷載紆積慮未豁生遠情於地表起遙恨於天末霜盡川長雲平野闊恨遊襟之浩蕩憤羈怨之忉怛寐焉長想倏若有亡固將言而已歎信無哀而自傷撫余情之增軫悼人事之多戚曾浮促之幾何而 諸之纏邈思何憂而不入心何慮而不攢雖感目之一致終寄懷而百端若乃平原杳兮千里春青山遠兮萬里親迷

故鄉之處所減愛舊之聲塵願寄言而靡託思假
翼而無因徒極睇而盡思終天性而傷神或復天
高朔漠氣冷河關漢塞鴻度吳宮鷺還對落葉之
驅壽怨浮雲之慘顏爾乃永眺無見端居不聊愴
歸軒之寂寂傷遠客之悠悠月臨城曉風送邊秋
聞兮惘不寐凝笳動兮此夜愁及夫寒野蕭
條空山寂寥自鄢郢而途眇指邯鄲而路遙傷永
離兮浦曲訣遠送兮河橋眺平蕪之漫漫瞻遠樹
之迢迢仡然直視嗑矣魂銷形將槁木同植心與
飛蓬共飄至如隴上從軍漢陽謫戍挿羽朝急要

鞭夜赴黥黥寒雲蒼蒼關樹甘埋影於異域蹙回
首於歸路魂逝兮邑里目斷兮煙霧步將前而復
畱望欲罷而還顧都驚塵之歛起見征羽之將度
泉石愴而增咽行人悲而失措亦有擣衣思婦織
錦從人看粉黛兮無色視桃李兮非春君去兮還
無期妾心兮私自悲高臺四望無極天天涯一去
何時盡 天涯兮綿綿問道路兮將幾千朝朝暮
暮綺窓前長懷此恨終永年若夫羈旅失職之人
放逐流離之客羗抱恨而誰訴塊緘愁而不懌於
是窮澤際天滄流拂漢屬榮悴兮時改遇炎涼兮

李嶠集卷上
節換莫不瞻草木而孤絕向風煙而永歎故夫望
之爲體也使人慘悽伊鬱惆悵不平興發思慮震
蕩心靈其始也罔兮若有求而不致也悵乎若有
待而不致也悠悠揚揚似出天壤而涉雲莊遂遂
巡巡若失其手而忘其真群感方興衆念始并旣
情招而思引亦目受而心傾浩兮漫兮終遇遠兮
肆兮流兮宕不返兮然後精迴魄亂神飛志否憂
憤總集莫能自止雖剛悍武力之夫法度禮容之
志孰不解夫剛毅廢綱遺紀衍借使 河負海牛
山之美可遊左江右湖京臺之樂難忘

金石悲兮綺羅傷顧山川以永慨邈千秋而詎央
若乃羊公惻愴於峴山孔宣憫默於曲阜王生臨
遠而沮氣顏子登高而白首惟夫作聖明哲寬和
敦厚亦復怛色愀容喪精虧壽故望之感人深矣
而人之激情至矣必也念終懷始感徃悲來沿末
形 至造思繫無而生哀此懽娛者所以易情而
慷慨達識者所以凝慮而徘徊者也

五言古詩

秋山望月酬李騎曹

愁客坐山隈懷抱自悠哉況復高秋夕明月正徘徊

徊亭亭出迴岫皎皎映層臺色帶銀河滿光含玉
露開 雲籠影度虛暈抱輪迴谷邃涼陰靜山空
夜響哀寒催數鴈急風送一螢來獨軫離君恨遙
想故人杯

晚秋喜雨 并序

咸亨元年自四月不雨至秋九月王畿之內嘉穀
不滋君子小人惶惶如也天子慮深求瘼念在責
躬避寢損膳錄寃弛役牲幣之禮遍於神祇鐘庾
之貸周於窮乏至誠斯盛靈睭有融爰降甘澤大
拯炎亢朝庭公卿相趨動色里閭昨庶謳吟成響

年和俗阜於焉可致撫事形言孰云能已乃詩曰
積陽纏首夏隆旱屆徂秋炎威振皇服敲景暴神
州氣滌朝川朗光澄夕 浮草木委林甸禾黍悴
原疇國懼流金生人深懸磬憂紫宸兢履薄丹宸
念推溝望肅壇場祀寃申囹圄囚御車遷玉殿薦
菲撤瓊羞濟窘邦儲發蠲窮井賦優服閒雲驥屏
冗術土龍修睿感通三極天誠貫六幽夏祈良未
擬商禱詎爲儔穴蟻禛符應山蛇毒影收騰雲八
際滿飛雨四溟周聚霽籠仙闕連霏繞畫樓旱陂
仍積水涸沼更通流映穗萎還結寒苗瘁復抽九

農歡歲阜萬寓慶時休野洽如坻詠途喧擊壤謳
幸聞東李道欣奉北塲遊

奉教追赴九成宮途中口號

委質承仙翰祇命遄搖策事偶從梁遊人非背淮
客長驅歷川阜迴眺窮原澤鬱鬱桑柘繁油油禾
黍積雨餘林氣靜日下山光夕未攀叢桂巖猶倦
飄蓬陌行當奉麾蓋慰此勞行役

和同府李祭酒休沐田居

列位簪纓序隱居林野躅徇物爽全直棲真昧均
俗若人兼吏隱率性夷榮辱地籍朱郎基家在青

山足斲弭西園蓋言事東臯粟築室俯澗濱開扉
面巖曲庭幽引夕霧簷迴通晨旭迎秋谷黃含
露園葵綠勝情狎蘭杜雅韻鏘金玉伊我懷丘園
願心從所欲

扈從還洛呈侍從羣官

四海帝王家兩都周漢室觀風昔來幸御氣今旋
蹕雷奮六合開天行萬乘出玄冥奉時駕白矩叅
戎律後隊咽笳聲前驅嚴罕輝光射東井禁令
橫西秩帳殿別陽春旌門臨甲乙將交洛城雨稍
遠長安日邛鞮雲外來咸秦霧中失孟冬霜霰下

是日農功畢天道向歸餘皇情美陰隲行在名嶽
禮迺問高年疾祝鳥旣開羅調人更張瑟登源采
謳誦俯谷求才術邑罕懸磬貧山無掛瓢逸施恩
浹寰宇展義該文質德澤盛軒游哀矜深禹恤申
歌地廬駭獻壽衢罇溢瑞色抱氤氳寒光變蕭颺
宗枝旦爽輔侍從王劉疋並緝蛟龍書同簪鳳皇
筆陶甄荷吹萬頌歎歸明一歡與道路長顧隨談
笑密叨承廊廟選謬齒夔龍弼喜構大厦成慙非
隆棟吉

奉使築朔方六州城率爾而作

奉詔受邊服總徒築朔方驅彼犬羊族正此戎夏
疆子來多悅豫王事寧怠遑三旬無愆期百雉鬱
相望雄視沙漠垂有截北海陽二廷已頓顙五嶺
盡來王驅車登崇墉顧眄凌大荒千里何蕭條草
木自悲涼憑軾訊古今慨焉感興亡漢障緣河遠
秦城入海長顧無廟堂策貽此中夏殃遁隱前業
衰運開今化昌制為百王式舉合千載防馬牛被
路隅鋒鏑銷戰場豈不懷殆勞所圖在永康王車
何爲者稱代陳頌章

早發苦竹館

合沓巖嶂深朦朧烟霧曉荒阡下樵客野猿驚山
鳥開門聽潺湲入徑尋窈窕栖颯抱寒木流螢飛
暗篠早霞稍霏霏殘月猶皎皎行看遠星稀漸覺
游氛少我行撫輶傳兼得傍林沼貪翫水石奇不
知川路渺徒憐野心曠詎惻浮年小方解寵辱情
求託累塵表

安輯嶺表事平罷歸

雲端想京縣帝鄉如可見天涯望越臺海路幾悠
哉六月飛鵬去三年瑞雉來境遙銅柱出山險石
門開自我違瀍洛瞻途屢揮霍朝朝寒露多夜夜

征衣薄白簡承朝憲朱方撫夷落既弘天覆廣且
諭皇恩溥皇恩溢外區俗詠來蘇聲朔臣天子
壇場拜老夫絳宮韜將畧黃石寢兵符返旆收龍
虎空營集鳥鳥日落澄氛藹憑高視衿帶東甌抗
千越南斗臨吳會春色遶邊陲飛花出荒外卉服
紛如積長川思遊客風生丹桂晚雲起蒼梧夕去
軸艤清江歸軒趨紫陌衣裳會百蠻委重關
不學金刀使空持寶劍還

七言古詩

寶劍篇

吳山開越溪澗三金合冶成寶鏐淬綠水鑿紅雲
五采焰起光氛氳背上名爲萬年字胸中點作七
星文龜甲參差白虵色輒轡宛轉黃金飾文犀中
斷寧方利駿馬群駢未擬直風霜凜凜匣上青精
氣遙遙斗間明避災朝穿晉帝屋逃亂夜入楚王
城一朝運偶逢大仙虎吼龍鳴騰上天東谷顯昇
紫微座西王佩下赤城田承平久息干戈事僥倖
得充文武備除災辟患宜君王益壽延齡後天地

汾陰行

君不見昔日西京全盛時汾陰后土親祭祠齋宮

宿寢設備供撞鐘鳴鼓樹羽旌漢家四葉才且雄
賓延萬靈服九戎栢梁賦詩高宴罷詔書法駕幸
河東河東太守親掃除奉迎至尊導鑾輿五營夾
道列容衛三河縱觀空里閭迴旌駐蹕降靈場焚
香奠醑邀百祥金鼎發食正焜煌靈祗煒煒攄景
光埋玉陳牲禮神畢舉麾上馬乘輿出彼汾之曲
嘉可遊杏蘭爲檝桂爲舟棹歌微吟綵鷁遊簫鼓
哀鳴白雲秋歡娛宴洽賜群后家家復除戶牛酒
聲名動天樂無有千秋萬歲南山壽自從天子向
秦關玉輦金輿不復還珠簾羽帳長寂寞鼎湖龍

李嶠集卷上
九
髯安可攀千齡人事一朝空四海爲家此路窮雄
豪意氣今何在壇場官館盡蒿蓬路逢故老長歎
息世事回還不可測昔時青樓對歌舞今日黃埃
聚荆棘山川滿目淚沾衣富貴榮華能幾時不見
只今汾水上唯有年年秋鴈飛

擬古東飛百勞西飛鷺

傳書青鳥迎簫鳳巫嶺荆臺數通夢誰家窈窕住
園樓五馬千金照陌頭羅裙玉珮當軒出點翠施
紅競春日佳人二八盛舞歌羞將百萬呈雙娥庭
前芳樹朝夕改空駐妍華欲誰待 李嶠集卷上

李嶠集卷中

五言律詩

日

旦出扶桑路遙升若木枝雲間五色滿霞際九光
披東陸蒼龍駕南郊赤羽馳傾心比葵藿朝夕奉
光曦

月

桂滿三五夕莫分二八時清輝飛鵲鑑新影學蛾
眉皎潔臨踈牖玲瓏鑒薄帷願言從愛客清夜幸
同嬉

星

蜀郡靈槎轉豐城寶氣新將軍臨北塞天子入西秦
未作三台輔寧為五老臣今宵潁川曲誰識聚賢人

風

落日生蘋末搖颺徧遠林帶花迎鳳舞向竹似龍吟
今月動臨秋扇松清入夜琴蘭臺宮殿峻還拂楚王襟

雲

英雄大梁國郁郁書臺碧落從龍起青山觸石

來官名光邃古蓋影耿輕埃飛感高歌發威加四海迴

煙

瑞氣凌青閣空濛上翠微迥浮雙闕路遙拂九仙衣
桑柘迎寒色松篁暗晚暉還當紫霄上時接彩鸞飛

露

滴瀝明花苑歲蕤泫竹叢玉垂丹棘上珠湛綠荷
中夜警千年鶴朝零七月風願凝仙掌內長奉未央宮

霧

曹公迷楚澤漢帝出平城
泳野妖氛靜丹山霽色
明類煙方稍重方雨散還輕
倘入非熊繇寧思玄
豹情

雨

西北雲膚起東南雨足來
靈童出海見神女向日
迴斜影風前合圓文水上開
十旬無破塊九土信
康哉

雪

瑞雪驚千里彤雲暗九霄
龍沙飛正遠玉馬地還

銷逐舞花先動臨歌扇影飄
大周天闕路今日海
神朝

山

地鎮標神秀峨峨上翠氛
泉飛一道帶峰出半天
雲古壁丹青色新花綺繡
紋已開封禪所希謁聖
明君

石

宗子維城固將軍飲羽威
巖花鑑裏發雲葉錦中
飛入宋星初隕過湘鷺
早歸倘因特補極寧復想
支機

原

王粲銷憂日江淹起恨年帶川遙綺錯分隰迥阡
眠橫周甸莓苔闕晉田方知急難響長在鶴
鷓篇

野

鳳出秦郊迥鶉飛楚塞空蒼梧雲影去涿鹿霧光
通草暗少原綠花明入蜀紅誰言板築士猶處傳
巖中

田

貢禹懷書日張衡作賦辰杏花開鳳吟菖葉布龍

鱗瑞陌兩岐秀嘉禾同穎新寧知帝皇力擊壤自
安貧

道

銅駝分鞏洛劍閣抵臨邛紫微三千里青樓十二
重玉關塵似雪金穴馬如龍今日中衢上堯罇更
可逢

海

習坎䟽丹壑朝宗合紫微三山巨鼇湧九萬大鵬
飛樓寫青雲色珠含明月輝會因添霧露方逐衆
川歸

江

日夕三江望靈朝萬里迴霞津錦浪動月浦練花
開湍似黃牛去濤如白馬來英靈已傑出誰識卿
雲才

河

源出崑崙中長波接漢空桃花來馬頰竹箭入龍
宮德水千年變榮光五色通若披蘭葉檢

洛

九洛韶光媚三川物候新花明丹鳳浦日映玉鷄

津元禮期仙客陳王覩麗人神龜方錫瑞綠字仲
來臻

蘭

虛室重招尋忘言契斷金英浮漢家酒雪儷楚王
琴廣殿輕香發高臺遠吹吟河汾應擢秀誰肯訪
山陰

菊

玉律三秋暮金精九日開榮舒洛媛浦香泛野人
杯霍靡寒潭側丰茸曉岸隈黃花今日晚無復白
衣來

竹

高籀楚江濱
嬋娟含曙氛
白花搖鳳影
青節動龍文
葉掃東西日
枝梢西北雲
誰知湘水上
流淚獨思君

藤

吐葉依松磴
舒苗長石臺
神農嘗藥罷
質子寄書來
色映蒲萄架
花分竹葉杯
金隄不見識
玉潤幾重開

萱

屣步尋芳日
忘憂自結叢
黃英開養性
綠葉正依

籠色湛先人
露香傳少女
風還依北堂
下曹植動

文雄

茅

楚甸供王日
衡陽入貢年
麇包青野外
鷗嘯綺楹前
堯帝成茨罷
殷湯祭雨旋
方期大君錫
不懼小巫捐

荷

新溜滿澄陂
圓荷影若規
風來香氣遠
日落蓋陰移
魚戲排細葉
龜浮見綠池
魏朝難接採
楚服但同披

萍

二月虹初見三春蟻正浮青蘋含吹轉紫蒂帶波
流屢逐明神薦常隨旅客遊既能甜似蜜還造楚
王舟

菱

鉅野韶光暮東平春溜通影搖江浦月香引棹歌
風日色翻池上潭花發鑑中五湖多賞樂千里望
難窮

瓜

欲識東陵味青門五色瓜龍蹄遠珠履女臂動金

花六子方呈瑞三僊實可嘉終朝奉絺綌謁帝佇
非賒

松

鬱鬱高巖表森森幽澗陲鶴棲君子樹風拂大夫
枝百尺條陰合千年蓋影披歲寒終不改多節幸
君知

桂

未植銀宮裏寧移玉殿幽枝生無限月花滿自然
秋俠客條為馬仙人葉作舟願君期道術攀折可
淹留

槐

暮律移寒火春宮長舊栽
葉生馳道側花落鳳庭隈
烈士懷忠觸鴻儒訪業來
何當赤墀下疎幹擬三台

柳

楊柳鬱氤氲金堤總翠氛
庭前花類雪樓際葉如雲
列宿分龍影芳池寫鳳文
短簫何以奏攀折爲思君

桐

孤秀嶧陽岑萋萋出衆林
春光襍鳳影秋月弄圭

陰高映龍門迥雙依玉井深
不因將入爨誰爲作鳴琴

桃

獨有成蹊處穠華發井旁
山風凝笑臉朝露泣啼粧
隱士顏應改仙人路漸長
還欣上林苑千歲奉君王

李

潘嶽閑居日王戎戲陌辰
蝶遊芳徑馥鶯轉弱枝
新葉暗青房晚花明玉井
春方知有靈幹時用表真人

梨

擅美玄光側傳芳瀚海中鳳文踈象郡花影麗新
豐色對瑤池紫甘依大谷紅若令逢漢主還冀識
張公

梅

大庾歛寒光南枝獨早芳雪含紫花色風引上春
香粧面廻青鏡歌塵起畫梁若能遙止渴何假泛
瓊漿

橘

萬里盤根植千株布葉繁旣榮潘子賦方重陸生

言玉藹含霜動金衣逐吹翻願辭湘水曲長茂上

林園

鳳

有鳥居丹穴其名曰鳳凰九苞應靈瑞五色成文
章屢向秦樓側頃過洛水陽鳴岐今日見阿閣佇
來翔

鶴

黃鶴遠聯翩從鸞下紫煙翱翔一萬里來去幾千
年已憇青田側時遊丹禁前莫言空警露猶冀一
聞天

鳥

日落朝飛急霜臺夕影寒聯翩依月樹迢遞遶風
竿白首何年改青禽此夜彈靈臺如可託千里向
長安

鵲

不分荆山抵甘從石印飛危巢畏風急繞樹覺星
稀喜逐行人至愁隨織女歸儻遊明鑑裏朝夕動
光輝

鴈

春輝滿朔方候鴈發衡陽望月驚弦影排雲結陣

行往還倦南北朝夕苦風霜寄語能鳴侶相隨入
帝鄉

鳧

颯沓睢陽淚浮遊漢水隈錢飛入井見鶴引入琴
哀降將貽詩罷王喬曳鳥來何當歸太液翔集動
成雷

鸞

睨睨度花紅關關亂曉空乍離幽谷日先轉上林
風翔集春臺側低昂錦帳中聲詩辨博忝比興思
無窮

雉

白雉振朝聲飛來表太平楚郊疑鳳出陳寶若鷄
鳴童子懷仁至中郎作賦成冀君看飲啄取介獨
含情

燕

天女同辰至玄衣澹碧空差池沐時雨頡頏舞春
風相賀雕欄側雙飛翠幕中忽驚留爪去猶冀識
吳宮

雀

大厦初成日嘉賓集杏梁啣書表周瑞入幕應王

祥暮宿江城裏朝遊漣水傍願齊鴻鵠志希逐鳳
凰翔

龍

啣燭耀幽都含章擬鳳雛西秦飲渭水東洛薦河
圖帶火移星陸騰雲出鼎湖希逢聖人步庭闕正
晨趨

麟

漢祀應祥開魯郊西狩迴奇音中鍾呂成角喻英
才畫像臨仙閣藏書入帝臺若驚能吐哺為覩鳳
凰來

象

鬱林開郡畢維揚作貢初萬推方演楚惠子正焚
書執燧奔吳戰量舟入魏墟六牙行致遠千葉奉
高居

馬

天馬本來東嘶驚御史駉蒼龍遙逐日紫鷲迥追
風明月來鞍上浮雲落蓋中得隨穆天子何假唐
成公

牛

高歌初入相燕陣早橫功欲向桃林下先過梓樹

折通
中在吳頰喘月奔夢屢驚風不用五丁士如何九

豹

車法肇宗周颺文闡大猷還將君子變來蘊太公
誅委質超羊鞞飛名列虎侯若令逢雨露長隱南
山幽

熊

導洛宜陽古乘春別館前昭儀忠漢日太傅翊周
年列射三侯滿興師七步旋莫言舒紫褥猶異飲
清泉

鹿

涿鹿開中冀秦原闢帝畿柰花開舊苑萍葉藹前
詩道士乘仙日先生折角時方懷丈夫志抗首別
心期

羊

絕飲懲澆浴行驅夢逸材仙人擁石去童子馭車
來夜玉含星動晨氈映雪開莫言鴻漸力長牧上
林隈

兔

上蔡應初擊平岡遠不稀目隨槐葉長形逐桂條

飛漢月澄秋色梁園映雪輝唯當感純孝郭郭引
兵威

城

四塞稱天府三河建浴都飛雲藹層闕白日麗南
隅獨下仙人鳳群驚御史烏何辭一萬里邊檄悍
匈奴

門

奕奕彤闈下煌煌紫禁隈阿房萬戶列閭闔九重
開踈廣遺榮去于公待駟來詎知金馬側方朔有
奇才

市

闕闐門三市旗亭起百尋漸離初擊筑司馬正彈
琴細柳龍鱗映長槐兔月陰徒知觀衛玉詎肯掛
秦巾

井

玉甃談仙客銅臺賞魏君蜀都宵映火杞國旦生
雲向日蓮花淨含風李樹薰已開千里國還聚五
星文

宅

寂寂蓬蒿徑喧喧湫溢廬屢逢長者轍時引故人

車孟母遷鄰罷將軍辭第初誰憐草玄處獨對一
牀書

池

綵棹浮太液清觴醉習家詩情對明月雲曲拂流
霞烟散龍形淨波含鳳影斜安仁動秋興魚鳥思
空賒

樓

百尺重城際千尋大道隈漢宮井幹起吳國落星
開笛怨綠珠去簫隨弄玉來銷憂聊假日誰識仲
宣才

橋

烏鵲填應滿黃公去不歸勢疑虹始見形似鴈初
飛妙應七星制高分半月輝秦王空構石仙島遠
難依

舟

征棹三江暮連檣萬里迴相烏風際轉畫鷁浪前
開羽客乘霞至仙人弄月來何當同傳說特展巨
川材

車

天子馭金根蒲輪闢四門五神趨雪至雙轂似雷

奔丹鳳棲金轄非熊載寶軒無階忝虛古珠乘奉
王言

牀

傳聞有象牀疇昔獻君王玳瑁千金起珊瑚七寶
粧桂筵含栢馥蘭席拂沉香願奉羅帷夜長承秋
月光

席

避坐承宣父重筵揖戴公桂香浮半月蘭氣襲回
風舞拂丹霞上歌清白雪中佇將文綺色舒卷帝
王宮

帷

久閉先生戶高褰太守車羅將翡翠合錦逐鳳凰
舒明月彈琴夜清風入幌初方知決勝策黃石受
兵書

簾

清風時入燕紫殿幾含秋曖曖籠靈閣纖纖上玉
鈎窓中翡翠動戶外水晶浮巧作盤龍勢長迎飛
燕遊

屏

洞徹琉璃蔽威紆屈膝迴錦中雲母列霞上織成

開山水含春動神仙倒景來修身兼竭節誰識作
銘才

被

桂友尋東閣蘭交聚北堂象筵分錦繡羅薦合鴛
鴦光逸偷眠穩王章泣恨長孔懷欣共寢棣萼幾
含芳

鑑

明鑑掩塵埃含情照魏臺日中烏鵲至花裏鳳凰
來玉彩疑冰澈金輝似月開方知樂彥輔自有鑒
人才

扇

翟羽舊傳名蒲葵價不輕花芳不滿面羅薄詎障
聲禦熱含風細臨秋帶月明同心如可贈特表合
歡情

燭

兔月清光隱龍盤盡燭新三星花入夜四序玉調
晨浮炷依羅幌吹香匝綺茵若逢燕國相特用舉
賢人

酒

孔坐洽良儔陳筵幾獻酬臨風竹葉滿湛月桂香
浮每接高陽宴長陪河朔遊會從玄石飲雲雨出
圓丘

李嶠集卷中

吳時用書黃
麗賢金賢刊

李鴻章奏稿

卷一

